

आकाशवाणी जयपुर—अजमेर प्रादेशिक समाचार ।

दिनांक 13.05.2024

समय: 18.45 बजे

- लोकसभा चुनाव रा चौथा दौर रा तैत आज नौ राज्यां अर केन्द्र रा राज वाळा एक एक प्रदेश री 96 सीटां माथे वोट पड्या ।
- सीबीएसई दसवीं अर बारहवीं कक्षा रा इम्तिहान रा नतीजां रो ऐलाण कीनो—मैट्रिक मांय 93 दशमलव छह अर 12वीं मांय करीब 88 फीसदी परीक्षार्थी पास व्ह्या ।
- पश्चिमी विक्षोभ रा असर ऊं प्रदेश मांय आज केई ठोडां बिरखा व्ही— घणखर ठोडां आंधी—बारिश सारू चैतायी ज्यो ।
- केन्द्रीय स्वास्थ्य मंत्रालय री रैंकिंग मांय राजस्थान मेडिकल सर्विसेज कॉरपोरेशन देश मांय अव्वल ।

000

लोकसभा चुनाव रा चौथा दौर रा तैत आज केंद्र रा राज वाळा जम्मू कश्मीर अर नौ राज्यां री 96 संसदीय सीटां सारू वोट पड्या । आं मांय आंध्रप्रदेश री 25, तेलंगाना री 17, उत्तर प्रदेश री 13, महाराष्ट्र री 11, मध्यप्रदेश अर पश्चिम बंगाल री आठ—आठ, बिहार री पांच अर झारखंड अर ओडिशा री एक—एक सीट अर जम्मू—कश्मीर री एक सीट शामिल है । चुनाव रा ई दौर मांय एक हजार सात सौ 17 उम्मीदवार चुनाव मैदान मांय है ।

000

केंद्रीय माध्यमिक शिक्षा बोर्ड—सीबीएसई आज मैट्रिक अर बारहवीं कक्षा रा इम्तिहान रा नतीजा रो ऐलाण कर दीनो। 12वीं मांय 87 दशमलव नौ—आठ फीसदी विद्यार्थी पास व्ह्या। लारला साल री तुलना मांय शून्य दशमलव 65 फीसदी बत्ता विद्यार्थी पास व्ह्या। 24 हजार ऊं बत्ता उम्मीदवार 95 फीसदी ऊं बत्ता अर एक लाख 16 हजार ऊं बत्ता विद्यार्थी 90 फीसदी ऊं बत्ता नम्बर हासिल कीना। लड़कां री तुलना मांय छह दशमलव चार फीसदी बत्ती लड़कियां पास व्ही। मैट्रिक मांय 93 दशमलव छह फीसदी विद्यार्थी पास व्ह्या। 10वीं बोर्ड परीक्षा में कुल उत्तीर्ण प्रतिशत 93 दशमलव छह रहा। पौने 95 फीसदी लड़कियां अर 92 दशमलव एक—सात फीसदी लड़का पास व्ह्या। म्हाणी अजमेर खबरनवीस बतायो के सी.बी.एस.ई. रा अजमेर रीजन मांय 12वीं रा नतीजा 89 दशमलव पांच तीन फीसदी अर दसवीं बोर्ड रा इम्तिहान मांय अजमेर रीजन रो नतीजो 97 दशमलव 1 फीसदी रहयो।

.....

दसवीं रा इम्तिहान मांय **दौसा** रा केन्द्रीय विद्यालय रा सगळा विद्यार्थी पास व्हे गया। नतीजा बोर्ड री वेबसाइट सागे डिजिलॉकर अर उमंग एप्स माथे ई देख्या जा सके है। प्रधानमंत्री नरेन्द मोदी पास व्ह्या विद्यार्थियां ने बधाई देता थकां सोशल मीडिया रे जरिये विद्यार्थियां री कामयाबी मांय वां रा पिरवार वाळा अर अध्यापकां री कोशिशं री सराहवणा कीनी।

000

शिक्षा सचिव कृष्ण कुणाल आज जयपुर मांय आर.टी.ई. रा तहत गैर—सरकारी स्कूलां मांय मुफ्त भणाई सारु 25 फीसदी सीटां माथे दाखिला बाबत् लॉटरी निकाळी। भणाई—लिखाई रा हक— आर.टी.ई. रा तैत राज्य री करीब 33 हजार स्कूलां मांय बच्चां ने दाखिलो दियो जावेला। आर.टी.ई. रा तैत दाखिला सारु करीब 3 लाख अर्जियां मिली ही। 7 जून ऊं 25 जुलाई तांई पैला, 26 जुलाई ऊं 16 अगस्त

ताई दूजा अर 17 अगस्त ऊं 31 अगस्त ताई तीजा दौर मांय दाखिल दिया जावेला।

000

जयपुर मांय सिलसिलेवार बम धमाका व्ह्यां आज 16 साल व्हे गया। आं धमाकां मांय 70 ऊं बत्ता लोगां री मौत व्हे गयी अर डोढ सौ ऊं बत्ता लोग जख्मी व्हे गया हा। ई मौके शहर मांय केई संगठनां री ओर ऊं श्रद्धाजंलि कार्यक्रम राख्यी ज्या। उपमुख्यमंत्री दिया कुमारी बम धमाका रे कारण मर्या लोगां रा पिरवार वाळां सागे मुलाकात कीनी।

000

जयपुर री केई स्कूलां मांय आज बम धमाकां री धमकी मिल्यां पाछे पुलिस री ओर ऊं स्कूलां मांय जांच रो अभियान चलायी ज्यो। ई दौरान शंका लायक कोई चीज नी मिली। पुलिस जनता ऊं अफवाहां माथे ध्यान नी देवण री अपील कीनी है।

000

झुंझुनूं जिला मांय सूरजगढ़ कने रामरख री ढाणी रा रेहवासी फौजी जवान नंदूसिंह शेखावत देश सारू सब ऊं ऊंचो बलिदान दीनो है। लेह लद्दाख मांय फौज रा गोला बारूद डिपो मांय ट्रेड्समेन मेट रा ओहदा माथे लाग्योडा नन्दू सिंह आठ मई ने ड्यूटी री बगत एक बम फाट जावण ऊं जख्मी व्हे गया हा। घणा जख्मी नंदूसिंह ने चंडीगढ़ रा पीजीआई मांय रैफर करी ज्या, जठै ईलाज रे दौरान वे आज दम तोड़ दीनो। वां री पार्थिव देह आज चंडीगढ़ ऊं रवाना करी जावेला, जिण रो काल पूरा मान सागे दाग कर्यो जावेला।

000

.....

प्रदेश मांय पश्चिमी विक्षोभ रा असर ऊं आज केई ठोडां बिरखा व्ही। **बीकानेर** मांय दोपेरां पाछे बिरखा व्हेवण ऊं गर्मी ऊं साता मिली। म्हाणा **दौसा** खबरनवीस बतायो के सिंज्यां री पोर मेह व्हेवण अर कठे— कठे ओळा पड़बा ऊं गर्मी ऊं साता मिली।

.....

सिरोही जिला रा आबू रोड़ मांय व्ही बिरखा ऊं गर्मी ऊं आराम मिल्यो। **भीलवाड़ा** रा केई हलकां मांय ई सिंज्यां री पोर बिरखा व्ही। **टोंक** अर **डूंगरपुर** मांय ई छांटो-छिड़को व्ह्यो। **भरतपुर** मांय व्ही बिरखा ऊं लोगां ने गर्मी ऊं साता मिली।

.....

बांसवाड़ा, बागीदौरा, कुशलगढ़, सज्जनगढ़ अर छोटी सरवन हलकां मांय ई व्ह्या मेह ऊं तेज गर्मी ऊं साता मिली। **कोटपूतली-बहरोड़** जिला मांय तेज गर्मी ने ध्यान राखता थकां जिला कलेक्टर कल्पना अग्रवाल सगळा महकमां रा अहलकारां री मीटिंग बुला र पाणी री पूर्ति तैय करण समेत जरूरी हुकम दीना। **बूंदी** रा जिला कलेक्टर अक्षय गोदारा ई पाणी, बिजली मुहैया करावणो तैय करण अर मौसमी बीमारियां री रोकथाम बाबत् अहलकारां री मीटिंग ले र जरूरी हुकम दीना। वठे पाणी री परेशानी आगी करण री मांग करता थकां लोग प्रदर्शन कीनो। **भीलवाड़ा** मांय ई जिला कलेक्टर नमित मेहता अहलकारां ने जरूरत व्हेवण परां टैंकरां रे ज़रिए पाणी री पूर्ति तैय करण रा हुकम दीना। जालौर री जिला कलेक्टर पूजा पार्थ अहलकारां सागे मीटिंग कर र पीवण रा पाणी अर बिजली री पूर्ति तैय करण सारू अहलकारां सागे विगतवार चर्चा कीनी अर जरूरी हुकम दीना। **टोंक** मांय माणक चौक हलका री महिलावां पाणी अर बिजली री कमी दूर करण री मांग करता थकां जिला कलेक्टर रा दफतर सामी प्रदर्शन कीनो अर कलेक्टर ने मांग पानो सूप्यो। **टोंक** मांय जिला कलेक्टर अर जिला प्रमुख कलेक्टर रा दफतर मांय पंछियां सारू परिंडा बांध्या। **केकड़ी** मांय गायां ने गर्मी ऊं बचावण सारू गौशाला परिसर मांय छाया री व्यवस्था करी ज्यी है।

बाड़मेर मांय जनता रा सुबीता सारू नगर परिषद् री ओर ऊं प्याऊ री व्यवस्था करीजी है। दूजी कानी **चूरू** अर **जैसलमेर** मांय पड़ रही तेज गर्मी ऊं घणी परेशानी व्हे रही है। जैसलमेर मांय साढे 42 डिग्री

सेल्सियस तापमान दर्ज करी ज्यो। ई बीचे मौसम विभाग जयपुर, बीकानेर, अजमेर, भरतपुर अर कोटा संभाग मांय केई ठोडां 20 ऊं 40 किलोमीटर प्रति घंटा री रफ्तार ऊं आंधी चालण रा आसार जताया है। जयपुर, करौली, अलवर, दौसा, भरतपुर, सिरोही, उदयपुर, डूंगरपुर, बांसवाड़ा, प्रतापगढ़, चित्तौड़गढ़ अर झालावाड जिलां मांय ई 30 ऊं 50 किलोमीटर प्रति घंटा री रफ्तार ऊं बायरो बाजण रा आसार है। जयपुर, दौसा, करौली, झालावाड, उदयपुर अर आरे-सारे रा हलकां मांय कठे-कठे बीजळी पड़बा अर ओला पड़बा री संभावना है।

000

राजस्थान मेडिकल सर्विसेज कॉरपोरेशन लिमिटेड –आर.एम.एस.सी.एल. दवाईयां, सर्जिकल अर जांच उपकरणां री खरीद करण रा मामला मांय देश मांय अब्बल रही है। निगम री प्रबंध निदेशक नेहा गिरि आज जयपुर मांय राख्यी ज्यी एक संगोष्ठी मांय आ जाणकारी दीनी। वे बतायो के आरएमएससीएल बीईएमपी कार्यक्रम रा तहत लारला महीना तांई 1 लाख 43 हजार ऊं बत्ता उपकरणां री जाणकारी ई-उपकरण सॉफ्टवेयर मांय दर्ज करायी। गिरी बतायो के ई कार्यक्रम री सरूआत पाछे ऑनलाइन तरीका ऊं दर्ज करायी ज्यी 1 लाख 44 हजार 465 शिकायतां मांय ऊं 1 लाख 44 हजार 234 रो निपटारो कर दियो ज्यो।

000

भरतपुर-सौंख गेला माथे नदिया का नगला ऊं सोगर बीचे अणजाण गाड़ी कानी ऊं ऑटो रिक्शा ने टक्कर मार देवण रे कारण व्ह्या हादसा मांय ऑटो रिक्शा मांय सवार एक महिला री मौत व्हे ग्यी अर तीन जणा घणा जख्मी व्हे ग्या। पुलिस हादसा मांय जख्मी लोगां ने एम्बुलेंस रे ज़रिये आर.बी.एम. अस्पताल पूगाया। बालोतरा जिला मांय सिणधरी हलका रा भाटा गांव मांय दूध री डेयरी मांय घी बणावण री भट्टी रो बॉयलर फाट जावण ऊं एक जणा री मौत व्हे ग्यी अर दो जणा घणा जख्मी व्हे ग्या। ज्यां ने ईलाज सारू जोधपुर रैफर करी ज्या है।

000

अजमेर जिला रा पुष्कर मांय आज पुलिस री ओर ऊं मैराथन दौड़ राख्यी ज्यी । **“स्वस्थ, स्ट्रॉंग और फिट पुष्कर”** थीम माथे राख्यी ज्यी आ दौड़ मेला मैदान ऊं सरू व्हे र वठे ई आ र पूरी व्ही । मैराथन मांय पुष्कर अर अजमेर समेत प्रदेश रा न्यारा–न्यारा हलकां ऊं आया लोग सिरकत कर र पुष्कर री पवित्रता ने बणायी राखण अर फिट रेहवण रो संदेश दीनो ।

000

कोटा मांय रेल मांय सफर करण वाळां ने चेन खींच र रेल रोकण, रेल मांय मुसाफिरां ने अपराधी किस्म रा लोगां कानी ऊं ज़हरीली चीजां खिलावण, मुसाफिरां रा सामान री चोरी व्हेवण अर गैर कानूनी तरीका ऊं रेल री पटरियां पार करण ऊं जुड़या कानूनां रा बारा मांय जाणकारी दीरीजी अर मुसाफिरां ने जरूरी राय दीरीजी ।

000